



Ika-Kawhaag-Tulo nga Dominggo sa Kasarangang Panahon Septiyembre 7, 2014

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, Apinaagi sa Gagmayng Simbahanong Katilingban, magabuhat sa kabubut-on sa Amahan hinubad ang mga timailhan sa panahon pinaagi sa pagpakig-uli subay sa hustisya ug walay kinutubang gugma!

Uban sa PKP - II, magpadayon kita sa pagpamalandong sa gasa sa Pagtuo nga gihatag sa Dios kanato pinaagi ni Jesus. Ang PKP - II nag-ingon:

“2. Pagpuyo sa Pagtuo

2.b) Pagsaksi

(78) Ang pagtuo mao ang pagsaksi sa Ginoo diha sa atong kinabuhi pinaagi sa pagsunod sa iyang mga sugo ug sa pagpuyo sa Ebanghelyo. Ang atong Ginoo nag-awhag kanato: ‘... ang inyong kahayag kinahanglang modan-ag sa uban aron sila makakita sa inyong mga maayong buhat ug makahimaya sa inyong langitnong Amahan.’ Niining pagsaksi sa maayong kinabuhi kinahanglang idugang pa ang pagsaksi sa pagmantala sa Ginoo: ‘Kita mituo ug busa kita mosulti.’ Unsaon gayud nato pagpakahilom mahitungod sa Dios nga nahigugma kanato, ang sa Anak nga nag-ula sa iyang kinabuhi alang kanato, ug ang sa Espiritu nga nagapuyo sulod kanato? ‘Dili mahimo nga dili kami mosulti mahitungod sa among nakita ug nadungog,’ mipahayag ang mga Apostoles ngadto sa mga tawo nga midili kanila sa pagsulti. Sa pagkasinati sa presensya ug gugma sa Ginoo diha sa pag-ampo ug

pagsimba, ang Kristiyano kinahanglang molakaw ug magpamatuod bahin Kaniya.

c) Mahigugmaong Pag-alagad

(79) Apan ang pagtuo gibansay dili lamang sa dayag nga mga relihiyosong buhat. Kinahanglang bansayon kini sa pagpangalagad, sa pag-atiman sa mga nanganihanglan ug sa pag-atiman alang sa atong kalibutan. Giila sa pagtoo nga ang silingan dili lamang usa ka tawong gilalang sa hulagway ug kasamahan sa Dios, kondili usa ka tigdala ni Kristo mismo, aron nga kung unsa man gani ang gibuhat ngadto sa labing ubos Niyang mga kaigsoonan kini gibuhat gayud ngadto Kaniya. Ug ang pagtuo usab nag-ila nga ang kinaiyahan sa kalibutan kinahanglang amomahon ug atimanon. Ang kalaglagaan niini dili lamang mao ang katapusan sa mga sistemang nagsapupo sa kinabuhi kondili pagluib usab sa atong pagka-tinugyanan sa mga nilalang sa Diyos .

(80) Ang pagpahayag sa atong pagtuo pinaagi sa mga buhat sa hustisya ug gugma mao ang punting dinaliang panginahanglanon sa Pilipinas kon diin ang pagbansay sa pagtuo sa kasagaran daw kutob lamang sa mga relihiyosong kalihokan ug pribadong moralidad.”

Sa imong kinabuhing personal, ug isip GSK, unsa ma’y imong giisip nga mga buhat sa pagtuo nga dili “dayag nga relihiyoso”? Unsa ang imong mga ministeryo sa pag-alagad ngadto sa imong silingan ug alang sa pag-atiman sa palibot ug sa tanang nilalang? Aduna ka bay ministeryo para sa hustisya ug kalinaw? Nganong imo man kini silang giisip nga batakang pagbansay sa pagtuo ug sa Kristohanon o Katolikong moralidad? ■

RITO SA PAGSUGOD

Ikaw matarung, O Ginoo, ug ang imong paghukom makatarunganon; tagda ang imong sulugoon sa paaging haum sa imong maloloy-ong gugma.

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Pasiuna ug Pag-abi-abi

P: Mga igsoon: Maayong pag-abot na usab dinhi sa kasaulogan sa gugma ug kinabuhi sa Diyos nga manggihatagong gipaambit niya kanatong tanan. Sa usa ka espesyal nga paagi, mag-ampo kita niining Eukaristiya alang sa gasa sa usa ka mas lawom nga pagtuo, usa ka mas hamtong ug hingkod nga pagtuo. Hinaut nga ang tanan natong gihunahuna, gibati, gisulti ug gibuhat mogitib unta gikan sa usa ka pagtuo nga nagasalig, nagasaksi, naga-alagad, naga-atiman sa tibook nilalang, nga nagabuhat sa hustisya aron pagpanday sa kalinaw.

Akto sa Paghinulsol

P: Mga minahal kong mga igsoon: andamon karon nato ang atong mga kaugalingon sa pagsaulog niining sakramento pinaagi sa pagpangamuyo sa kalooy ug pasaylo sa Diyos kay siya mao ang atong Dios sa gugma ug kalooy.

P: Ginoong Jesus, ikaw mitawag kanamo sa pagtuo pinaagi sa pag-alagad sa among silingan. Ginoo, malooy ka.

K: *Ginoo, malooy ka.*

P: Ginoong Jesus, ikaw mitawag kanamo sa pagtuo pinaagi sa pag-atiman sa tanang nilalang. Kristo, malooy ka.

K: *Kristo, malooy ka.*

P: Ginoong Jesus, ikaw mitawag kanamo sa pagtuo pinaagi sa pagbuhat sa hustisya ug sa pagpanday sa kalinaw. Ginoo, malooy ka.

K: *Ginoo, malooy ka.*

P: Kaloy-an unta kita sa Dios nga makagagahum sa tanan ug pasayloon ang

atong mga sala, dad-on unta kita niya ngadto sa kinabuhing dayon.

K: *Amen.*

Himaya sa Diyos didto sa langit...

Kolekta

P: Mag-ampo kita: O Dios, pinaagi kanimo kami natubos ug nakadawat sa pagkasinagop, tan-awa nga mapalanggaon ang imong mga hinigugmang anak, nga kadtong motuo kang Kristo makadawat sa tinuod nga kagawasan ug sa usa ka kabiling walay katapusan. Kini among gipangayo pinaagi sa among Ginoong Jesukristo imong anak, nga buhi ug hari uban kanimo ug sa Espiritu Santo, Diyos nga usa hangtud sa kahangturan.

K: *Amen.*

LITURHIYA SA PULONG

Unang Pagbasa: Ezekel 33:7-9

L: Pagbasa gikan sa Unang Basahon sa Propeta Ezekiel

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Ezekel 33:7-9:

Gitahasan karon ang propeta isip usa ka magbalantay sa kinatibuk-ang komunidad ug sa tagsa-tagsa nga sakop sa komunidad. Iyang misyon ang pagsakgang sa bisan unsa nga kadaot nga moabot sa komunidad ug sa mga sakop niini pinaagi sa pagbasa sa mga ilhanan sa panahon ug sa pag-aninag gikan niini sa kabubut-on sa Dios ug sa tubag sa katawhan. Kini mao'y usa ka maambong nga buluhaton sa propeta: ang porsegidong pagpamulong sa kabubut-on sa Dios gikan sa mga timailhan sa panahon ngadto sa katawhan. Ang pagpakyas niya sa pagbuhat niini nagpasabut nga siya mao ang responsable sa bisan unsay dangatan sa komunidad ug sa mga indibidwal nga sakop niini.

Salmo Responsoryo: Salmo 95:1-2, 6-7, 8-9

(Basahon gikan sa Kasulatan)

Komentaryo sa Salmo 95:

Kini nga salmo adunay duha ka bahin: ang himno (b. 1-7c) ug usa ka mapanagnaon nga pulong sa Dios (bb. 7d - 11). Ang himno nagdapit sa mga tawo sa pagdayeg sa Dios tungod kay ang Dios mao ang Bato sa Kaluwasan. Ang mga buhat sa salmista, ug kanilang mo-awit sa salmo, mao ang sa pagyukbo sa pagsimba, sa pagluhod atubangan sa Ginoo. Ang pagyukbo ug pagluhod mao ang mga buhat sa pagpasakop ug pagsunod sa Dios. Unya gihinumdoman sa salmo ang pagkamasupilon sa Israel didto sa kamingawan, sa Meriba, ang dapit sa tintasyon. Kini mao ang matagnaong pasidaan: hinaut nga dili sublion niini nga kaliwatan ang pagkamasupakon sa iyang mga katigulangan!

Ikaduhang Pagbasa: Roma 13:8-10

L: Pagbasa gikan sa sulat ni San Pablo ngadto sa mga taga-Roma

(Basahon gikan sa Kasulatan)

L: Ang Pulong sa Ginoo.
K: *Salamat sa Dios.*

Komentaryo sa Roma 13:8-10:

Ang sulat ngadto sa mga taga-Roma gihimo kaniadtong mga tuig 57 o 58 KP, sa paghari ni Nero apan sa wala pa niya ilunsad ang gikaintapang paglutos sa mga Kristiyano nga nagresulta sa pagkamartir ni Pedro ug Pablo. Niining kontekstoha, naka-insistir si Pablo nga ang usa ka Kristiyano mabuhi sa bisan unsang matanga sa Estado ug magpuyo nga maayong lungsoranon ubos sa mga balaod sa lehitimo ug matitud-anong gobyerno. Iyang nakita ang mga obligasyon sa mga lungsoranon, sama sa pagbayad sa mga buhis, isip usa ka pagpahayag sa batakang pahigugma sa usa ka Kristohanon ngadto sa isigkatawo. Busa, mahinungdanon kang Pablo nga ang usa ka tawo dili makautang ug bisan unsa kang bisan kinsa gawas sa paghigugma nga susama sa gihimo sa

Kristiyano: ang paghinigugmaay walay utlanan ug walay katapusan. Kini mao ang sukdanan sa usa ka talagsaong lungsoranon.

Berso sa Aleluya:

L: Aleluya, aleluya. R: Aleluya, aleluya! Gipasig-uli sa Dios ang kalibutan ngadto kaniya diha kang Kristo ug gitugyan niya kanato ang mensahe sa pagpakig-uli! **L: Aleluya, aleluya.**

Ebanghelyo: Mateo 18:15-20

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.
K: *Daygon Ikaw, O Kristo.*

Komentaryo sa Mateo 18:15-20:

Pagpakig-uli: kinsay gusto niini? Giisip sa mga iskolar sa bibliya ang ika-18 nga kapitulo sa Ebanghelyo ni Mateo ingon sa usa ka gamay nga eklesiyolohiya, sa ato pa, usa ka mubo nga pagtulon-an bahin sa Simbahan kansang identidad duol kaayo sa gingharian. Ang tumong sa mga buhat sa pagpakig-uli diha sa Simbahan, nga nag-uli sa usa ka napusgay nga relasyon, mao ang katarungan, ang pagkab-ot sa tarong nga relasyon sa mata'g tawo: nga ang igsoon nga nasayop mahimong matul-id ug dili na mobuhat pag-usab niini batok sa iyang silingan. Kini mao ang paghigugma sa silingan. Ang pagpangita sa pagpakig-uli kanunay mao ang nahaunang katungod sa nasad-an, sa biktima. Siya ang nahibalo sa gidak-on sa paglapas ug sa mga termino sa pagpahiuli tungod kay siya ang gipanamastamasan nga biktima. Kon dili modawat ang nakasala sa sayop niyang nahimo, ang nasad-an

magtawag ug mga saksi; kon ang nakasala magmagahi lang gihapon, ang kaso ipadangat ngadto sa Simbahan, sa Kristohanong katilingban, isip katapusang tigtimbang ug maghuhukom. Ang pagdumili sa pagdawat kalapasan atubangan sa Simbahan maghimo sa nakasala ug malapason nga usa ka sinalikway sa komunidad: siya paga-isipon nga taga-gawas!

Ang awtoridad sa pagpasaylo ug sa pagpangita sa pagpakig-uli gihatag sa matag miyembro sa Simbahan. Sa mas bata kang panglantaw, ang Simbahan isip usa ka katilingban, ang lawas ni Cristo, maoy sakramento nga timaan sa mahigugmaong pagpasaylo sa Dios, sa iyang makasaysayanong pagpailub, pagpakig-uli ug maloloy-ong paghukom. Ang pag-ampo sa katilingban, dili ang binagsa nga pag-ampo ug mga matang sa personal nga Pietismo, ang labing gamhanan tungod kay si Kristo labing duol kaayo kanila nga nagpundok, ug dili sa mga tawong daw mga isla sa ilang tinagsa-tagsang mga kaugalingon.

Please help us continue publishing this Missalette with your donation.

Any amount is appreciated no matter how small.

Thank you!

Account Name:

Communication Foundation for Asia

Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St.,
Sta. Mesa, Manila

Wali: Ang Simbahan sa Kabus, pinaagi sa Gagmayng Simbahanong Katilingban, magabuhat sa kabubut-on sa Amahan hinubad ang mga timailhan sa panahon pinaagi sa pagpakig-uli subay sa hustisya ug walay kinutubang gugma!

Sumadang Mensahe sa mga Pagbasa sa Dominggo	Ang Simbahan sa Kabus: Konkreto ng Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
Ang Simbahan sa Kabus, pinaagi sa Gagmayng Simbahanong Katilingban, magabuhat sa kabubut-on sa Amahan hinubad ang mga timailhan sa panahon pinaagi sa pagpakig-uli subay sa hustisya ug walay kinutubang gugma!	Unsa sa imong personal nga kinabuhi, ingon man usab sa inyong mga GSK, ang mga buhat nga imong gisip nga mga pagbansay sa pagtuo nga (a) naghatag ug pagsaksi, (b) nag-alagad sa mga silingan, (k) nag-atiman alang sa mga kinaiyahan ug sa nilalang, ug (d) nagbuhat ug hustisya ug nagtukod sa pakigdait.	“Ang lihok alang sa hustisya ug ang pag-apil sa pag-usab sa kalibutan hingpit alang kanamo nga uyokang sukod sa pagsangyaw sa Ebanghelyo” (Hustisya sa Kalibutan, 1971).

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka

Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo Katilingbanong Pag-ampo

P: Mga igsoon, mapasalamaton sa Dios para sa mga gasa sa kinabuhi ug gugma, ihalad nato karon ang atong mga pangaliyupo kaniya. Sa matag pag-ampo kita motubag: Ginoo, lig-ona ang among pagtuo.

T: *Ginoo, lig-ona ang among pagtuo.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, iyang ipadayon ang pagtultol kanato ngadto sa usa ka hamtong ug hingkod nga pagtuo pinaagi sa iyang pagsaksi sa proklamasyon ni Jesus ug sa iyang makaluluwas nga mga buhat, ug sa kinabuhi sa atong Simbahan isip pag-alagad sa silingan, pag-atiman sa mga nilalang ug isip mga buhat sa hustisya nga maghatud ngadto sa kalinaw. Mag-ampo kita sa Ginoo.

T: *Ginoo, lig-ona ang among pagtuo.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga sila unta magpadayon sa paglihok, nga walay kapoy-kapoy, alang sa pagpakig-uli pinasikad sa hustisya nga nagpanday ug kalinaw, ilabi na sa mga dapit sa mga panagbangi tungod sa in hustisya ug mga gubat . Mag-ampo kita sa Ginoo.

T: *Ginoo, lig-ona ang among pagtuo.*

L: Alang sa mga pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila magpadayon sa pagpalambo sa mga katungod ug kaayohan sa mga nagkalain-laing sektor sa katilingban sama sa mga lumad nga mga tribo, mga anak ug mga kabatan-onan, kababayen-an, mga mag-uuma ug mga pesante, mga kabus sa syudad, mga mangingisda ug sa mga lahi ug katakus. Mag-ampo kita sa Ginoo.

T: *Ginoo, lig-ona ang among pagtuo.*

P: Alang kanatong tanan, mga lumulupyo sa kalibutan ug mga lungsoranon sa langit: nga kita magdinasigay sa usag-usa sa paghimo ug mga diyalogo alang sa kaayohan sa kinaiyahan sama sa hinlo nga paglabay sa mga basura, sa pagsumpo sa walay pugong ug makagubang pagkalot sa mga balas, anapog ug mga yuta, sa makadaot nga pagpahimulos sa mga pisangan, mga batong buhi sa dagat ug mga puloy-anan sa kinabuhi sa dagat, ug sa mga makagun-ob ug makahilong pagmina. Mag-ampo kita sa Ginoo.

T: *Ginoo, lig-ona ang among pagtuo.*

L: Alang sa mga hinigugma natong nipanaw na: nga sa kapasayloan sa ilang mga sala, sila makakaplag sa walay katapusang pagpahulay diha sa kasingkasing sa atong Ginoo ug Manluluwas nga si Hesukristo. Mag-ampo kita sa Ginoo.

T: *Ginoo, lig-ona ang among pagtuo.*

L: Alang sa atong espesyal nga mga tinguha, diha sa kahilom sa atong kasingkasing. (*Hunong*) ...Mag-ampo kita sa Ginoo.

T: *Ginoo, lig-ona ang among pagtuo.*

P: Ginoong Dios, tan-awa ang imong katawhang nag-ampo karon. Pamatia ang pag-agulo sa imong

mga nilalang nga buot mahimong gawasnon gikan sa tawhanong kahakog ug pagpasipala. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: O Dios, nga naghatag kanamo sa gasa sa tinuod nga pag-ampo ug pakigdait, manggihatagong itugot nga, pinaagi niining halad, kami unta mobuhat sa angay nga pagsimba sa imong balaang kahalangdon ug, pinaagi sa pag-ambit sa sagrado nga misteryo, kami unta mamahimong matitud-anon nga maghiusa sa hunahuna ug kasingkasing. Pinaagi ni Kristo nga among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay pinaagi sa kalooy sa among pagkahisalaag, siya nagpaubos sa iyang kaugalingon, ug gipakatawo gikan ni Maria nga Birhen; pinaagi sa iyang pasyon sa Krus, giluwat kita niya gikan sa walay katapusang kamatayon, ug sa iyang pagkabanhaw gikan sa mga minatay, mihatag siya kanato sa kinabuhing walay katapusan.

Ug busa, uban sa mga Anghel ug mga Arkanghel, sa mga trono ug mga kagamhanan, ug sa tanan nga mga panon sa langit, maga-awit kami sa himno sa imong himaya, ug sa walay katapusan kami magpasidungog:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Gisangyaw namo ang imong Kamatayon, O Ginoo, ug gipadayag

**namo ang imong Pagkabanhaw
hangtud sa imong pagbalik pag-
usab.**

(Sa pagtapos sa Pag-ampong
Eukaristiko, ang pari moingon:)

P: Pinaagi kaniya, uban kaniya ug
diha kaniya, gihatag nganha kanimo
makagagahom nga Amahan, diha
sa kahiusa sa Espiritu Santo ang
tanang dungog ug himaya hangtod sa
kahangturan.

K: Amen.

Rito sa Pangalawat

P: Karon mag-ampo kita sa Amahan,
atong gamiton ang mga pulong nga
gitudlo kanato sa atong Manunubos.

*K: Amahan namo, nga anaa sa
mga langit, pagdayegon ang imong
ngalan, umabot kanamo ang imong
gingharian, matuman ang imong
pagbuot dinhi sa yuta maingon sa
langit. Ang kalan-on namo sa matag
adlaw, ihatag kanamo karong adlaw
ug pasayloa kami sa among mga sala,
ingon nga nagapasaylo kami sa mga
nakasala kanamo, ug ayaw itugot nga
mahulog kami sa panulay hinonoa
luwasa kami sa dautan.*

P: Mangayo kami kanimo, Ginoo,
nga imo kaming luwason sa tanang
dautan. Hatagi kami sa kalinaw
niining panahona, aron, tinabangan
sa imong kalooy, mahalikay kami
kanunay sa sala ug mahilayo sa
tanang kasamok, samtang nagapaabot
kami nga

malaumon sa pagbalik ni JesuKristo,
among manunubos.

*K: Kay imo man ang ginghamian/ ug
ang gahom ug ang himaya/ hangtod
sa kahangturan.*

P: Ginoong JesuCristo, nag-ingon
ka sa imong mga Apostoles, “Ang
kalinaw ibilin ko kaninyo, ang akong
kalinaw ihatag ko kaninyo.” Ayaw
tan-awa ang among mga sala, kondili

ang pagsalig sa imong Simbahan ug
sibo sa imong kabubut-on hatagi kami
sa imong kalinaw ug kahiusa, Ikaw nga
buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay
maanaa kaninyo.

K: Maanaa usab kanimo.

P: Ipakita ta ang atong panag-
inigsoonay.

Kordero sa Dios

*K: Kordero sa Dios nga nagawatang
sa mga sala sa kalibutan, kaloy-i kami.*

*Kordero sa Dios nga nagawagtang sa
mga sala sa kalibutan, kaloy-i kami.*

*Kordero sa Dios nga nagawagtang sa
mga sala sa kalibutan, hatagi kami sa
kalinaw.*

Pangalawat

P: Kini mao ang Kordero sa Dios
nga nagawagtang sa mga sala sa
kalibutan. Bulahan ang gidapit alang
sa panihapon sa Ginoo.

*K: Ginoo, dili ako angay nga
mokalawat kanimo, apan ipamulong
lamang ug mamaayo ako.*

Antipona sa Pagpangalawat:

*Sama sa lagsaw nga nangandoy sa
mga tubig sa kasapaan, dan, ang
akong kalag nangandoy kanimo,
akong Dios; ang akong kalag giuhaw
sa Dios, sa buhing Dios.*

Pag-ampo Human sa Pangalawat

P: Mag-ampo kita: Itugot nga ang
imong mga maunungon, O Ginoo,
kinsa imong gipakaon ug gihatagan
ug kinabuhi pinaagi sa pagkaon
nga imong Pulong ug langitnong
Sakramento, makatagamtam unta sa
mga kaayohan gikan sa mga dagkong
gasa sa imong hinigugmang Anak
aron nga kami mahimong takus sa usa
ka walay katapusang bahin sa iyang
kinabuhi. Siya nagpuyo ug naghari
hangtod sa kahangturan.

K: Amen.

Katapusang Panalangin:

P: Ang Ginoo maanaa kaninyo.

K: *Maanaa usab kanimo.*

P: Iduko ang atong mga ulo alang sa panalangin: Sa pagpanalipod sa imong mga anak, O Ginoo, kami naga-ampo, bakyawa ang imong halandong tuong kamot, aron, sa pagsunod sa imong amahanong kabubut-on, sila makaangkon sa walay kapakyasang pagpanalipod sa Imong amahanong pag-amoma. Pinaagi ni Kristo among Ginoo.

K: *Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: *Amen.*

Pagpanglakaw

P: Panglakaw kamo, human na ang misa.

K: *Salamat sa Dios.* ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.



**Ang
Simbahan sa
Kabus, pina-
agi sa Gag-
mayng Sim-
bahanong
Katilingban,
magabuhat
sa
Kabubut-on
sa Amahan
hinubad ang
mga timail-
han sa pana-
hon
pinaagi sa
pagpakig-uli
subay sa
hustisya ug
walay
kinutubang
gugma!**